

古今遊記叢鈔

卷之三十三 廣東省

遊白水山佛跡巖

宋 蘇軾

白水山在象頭南。羅浮之東麓也。有懸泉百仞。山八九折。折處輒爲潭。深石絕者四五丈。不能及。旁有巨人跡數十。謂之佛跡巖。巖西故有院。亦曰佛跡院。三月四日。遊白水山。佛跡巖。沐浴于湯泉。晞髮于懸瀑之下。浩歌而歸。有輿却行。以與客言。不覺至水北荔枝浦上。晚日葱曩。竹陰蕭然。時荔子纍纍如茭實矣。有父老八十五。指以告余曰。及是可食。公能携酒來遊乎。意忻然許之。歸臥既覺。聞兒子過。誦淵明歸園田居詩六首。乃悉次其韻。始余在廣陵。和淵明飲酒二十首。今復爲此。要當盡和其詩。乃已耳。今書已寄妙摠大士參寥子。

羅浮山行記

宋 趙汝馭

博羅郡太守。歲下元。將天子命有事於朱明洞天。事已。明日與客步自沖虛。東行數里。

泉聲潄然出藁翳中。其上則洞口也。由洞口而南有崑。雙壁宛若門然。從門以入。欻然見寒梅于藤梢棘刺間。崎嶇窈窕。皆有古意。顧者不甚見賞。問其地。則趙師雄醉醒花下。月落參橫。翠羽啾嘈處也。時道士方披棘導客。度蒙密。穿葱蒨。過犖确。則舍車就杖。扱衽以山路轉上腰。皆將興盡。獨余益上。登伏虎崑。至朝真石。視衆山于薳薳之罅。已培塿然矣。過分水凹。迤邐歷平曠。如塢如輿。忽然若憑虛上騰。以凌空。雲氣變態。不可名狀。猶天地混沌如雞子未判時。恨無廬可托。以伺日出。束葦續明。沿西而上。寄危磴于澹舒。細若綫縷。既卽聚星之榻。猶寤陽凜凜欲墜。黎明捐繯粟。命道士從所取道。闢焉。且以目行。心畫者指授之。曰。某地宜門。某地宜亭。又某地宜菴。屬博羅令贊其事。以明年成。再至而名人鉅公。亦巾車從五羊石來。嘯歌出紫羅。夜分猶未銷歇。老少遠近。相與讚嘆。自有此山。未有此景。旣醺而甘雨洗壇。詰旦而祥禽照采。又相賀以爲豐年之兆。賢人之徵也。驗之圖誌。皆謂然。豈帝祇山靈亦動心于此乎。少焉快晴。從余山行者。纍纍若魚貫。山之麓有門曰屐雲。表飛雲之屐如從足下也。向所謂洞口。有亭曰仙春。邇青遠白。佳趣現前。向所謂顧者不賞。有門曰梅花村。芳眼疎明。皆迎人笑。向所謂

興盡欲返。有亭曰橫翠。依崖據勝。可眺可休。向所謂薺薺之罇。有亭曰拂松。鏡石琴風。景象軒豁。向所謂無廬可託。有菴曰見日。卓然三千六百丈之上。審曲面勢。大約如指授。方余通宵來絕頂。噫然大塊。叫萬竅而舞六花。濛鬆一色。悽神寒骨。已而閉戶息視。及披衣起。天際已明。其上則暗。久之。火輪由暗中射飛濤以出。向所謂渾沌。又若造物者。始判清濁。而六合暉新也。林霏一開。負寒凌澌。變而明嵐煖翠。凡嶺南之山川隱顯。背嚮咸無遁形。登小石樓。望文溪東閣。于大石樓上。若與抱朴子。桃椎子。相期于縹緲。過中閣。飲茗。復歸沖虛。翌日訪諸菴。得桃源王寧。臨安人也。圓龕趺坐。不苟不葷。不跡戶外二十三年矣。命之往見。日菴人宜之。渠亦忻然。又規陽室。以違陰風。買腴田以給常住。山行勝槩。大都盡矣。

厓門弔古記

明 方良永

弘治甲子春二月丙午。予出按海北。取道新會縣。舟次東亭驛。縣官屬謁。既。予進知縣羅僑語之曰。厓山之事。千古痛憤。瓣香敬吊。行與子偕。乃具牲帛。僦民舟習海行者。以行。夜二鼓。乘汐出港口。前後數十舸齊發。風靜波平。予臥舟中。不知爲泛海也。天未明。

抵岸。予急起。盥櫛。起篷窗。東視厓門甚邇。景色矇矓未辨。登岸。肩輿由松逕縈紆而進。典祠者率其子恩平庠生。逆于道左。問之。勤王義士伍隆起七世孫也。予以松間且去祠伊邇。戒毋喝道。少頃至祠下。舍輿步入。先詣至全節。次詣大忠達觀二祠。殿宇碑亭。考其營建顛末。大忠則創于故方伯陶公自強。中祀文天祥陸秀夫張世傑三公。兩廡皆祀同時死節諸臣。東廡又特設伍隆起配享之位。全節則創于今僉司徐公朝文。特祀慈元楊太后。其額與祭。則皆上請于朝。得旨俞允者也。觀禮畢。易便服。穿叢薄間。從西上。直至山椒。轉顧後山蒼翠。亭聳如展。環視左右山。逶迤盤踞。如虎伏龍行。當建祠處。隆然突起。稍前又突出一阜。朝北如拱。水遶其勢如彎弓。隔岸諸峯層疊。秀麗如畫。無巉巖嶽岌之狀。較以形勝。此亦足恃。而顧不能救國之亡。豈地勢無與于人事。抑天命已去。非此所能勝歟。悄然而退。遂從東下。尋慈元殿舊址。去今所創祠可百步許。已鞠爲榛莽。復謁國母墳。墳在舊殿之南稍東。國母卽楊太后也。牡蠣爲垣。半已就頽。夫志不載楊太后塋處。而端宗陵寢見于志者。已漫不可尋。今國母有墳。巋然獨存。其好事者爲之。抑中原遺民。憫后之節。收其遺骸。或具衣冠瘞之。以示哀思歟。時微雨霏霏。

馳還具服行禮。始就位。天色晴朗。三獻既畢。日已正中。縣官請隨祭大忠。予謂祭吉禮。非日昃所宜行。乃約戊申日五鼓卽事。予回舟次。竚立岸上。見水鳥飛鳴下上。漁歌互答于兩涯。追思往事。盡然傷懷。徘徊間。典祠者曰。前有奇石可往觀。予遂乘小舟徑詣石處。躡磴仰視。巨石如屏。前二石如人立。頂趾皆巨。中約如腰狀。屏石上有刻。磨滅不可讀云。舊有大刻元柱國將軍張弘範滅宋于此。近巡按廣平徐公瑁易刻曰。宋丞相陸秀夫太傅張世傑死事於此。今石長字沒矣。予竊論弘範宜不足責。宋之執政以國與人。如棄遺然。恬不知恤。非得二三公振起其間。天理民彝。或幾乎息。彼弘範猶元臣也。何足深咎。况二三公之名實昭然史冊間。當與日月爭光。區區磨崖。胡能輕重。而必與之較爭哉。典祠者又云。昔有磨刀石。自海門飛來。至今尙在。予令覓之。潮沒不可得。乃返。因與羅尹論厓山事。謂當宋室播遷之時。楊后非正位中宮。三公非顧命大臣。皆無與國休戚存亡之義。卽使不死。亦無敢非之者。今其孤忠大節。乃出於尋常之所不料。此所以尤起後人追思景慕。不容已也。祠有田三頃餘。乃知縣丁積割廢寺遺業所充。又山故無虎豹。居民素不爲盜。巡司雖設。頻年無捕獲功。近稍不逞者。密誘他盜。

來掠其村。然猶畏不敢肆。天既薄暮。予獨坐舟中。感今念昔。屢就枕而不成寐。未五鼓。卽起與大忠之祭。既竣事。咸曰。自有厓山之行。天日無此晴霽。風波無此平安也。遂回舟。由故道過昨所觀奇石。值潮落趾出。牡蠣棲其四旁。男婦持器狀如斧。長二寸許。爭敲取之。又有荷鋤掘取蚌蛤于泥中者。驚從旁爭啄其餘。無驚懼態。無何入港。舟行至峴岡。漫書是行所見與所論議者。作厓山紀行錄。以朝文爲易今題。曰厓門吊古記。

七星巖記

明 吳桂芳

肇慶郡城北。有峯嶙峋葱鬱。森列棋布。如隕星麗地。錯落凡七。其中一峯宏開巖壑。虛明昭曠。可容數百人。嘉石穹窿。清泉映帶。誠一方之奇觀也。余參政東粵之明年五月。旣望高肇。參將鯉山鍾君。始邀余來游。顧瞻四塞。懸崖乘碧。金蓮玉桂。時方盛夏。煩暑頓除。絲竹壺觴。情興交暢。因念此巖僻在嶺海之間。軒蓋罕臨。聲稱未著。若俾產于通都上國。舟車會馳。冠裳萃止。則春風之前。秋月之夕。鴻生鉅儒之詠賞。吳姬越女之嬉游。當與蘭亭西湖鳳臺燕磯比雄于中原矣。旣共爲茲巖太惜。已而締觀巖下苔蘚滿目。荒穢成丘。頗蹈詩人樹檀維穽之誚。計一巖之飾。所費幾何。曾莫有爲之先者。何世

好事者之不多見也。蓋又共爲茲巖懷焉。以慨者久之。讌旣罷。爰進郡知事丘民惠于庭。授以規畫。伐石於山。鳩工于肆。拓材于沒入之羨。巖之外構亭數楹。扁曰臨壑。引石爲梯。直抵巖所。巖內築臺。高三丈。方廣若干丈。以待獻酬。其高爲小臺。稍加增葺。以待游衍。凡舊所未備者益之。污漫不飾者除之。工甫告成。余同年克齋殷君適蒞是郡。孟秋之朔。迺偕鯉山君具觴落之。舍止有亭。酬酢有臺。瞻依且嚴。高深可象。蓋旬月之間。川原已改色矣。余觀自古名山奧區。多因地而勝。抑或以人而傳。余非能重茲巖者。顧浸淫蕪莽。不知其幾千百年。而繕治緣飾。以成巨觀。則自余今日始。豈山川之汗隆晦顯。亦有時與。

游峽山飛來寺記

明 董傳策

自出肇慶。江稍平。氣稍朗。頓令人游與飛動。旣轉清遠江。忽憶張子儀及方郡守。曾爲余語峽山飛來寺之勝極趣。舟往探焉。俄見兩岸青峯挿出。南北壁峙。漚其江流。隘如束帶。世稱茲境爲福地。余登其寺。果雅絕。有二禺祠。讀書坑。相傳黃帝二庶子大禺仲陽隱居處。從祠左渡橋而上。有泉名定心泉。因坐挹泉亭。汲而嘗之。甚清甘。泉上爲觀。

音閣。諸僧云。昔有高僧掘泉不得。忽觀音現語曰。汝禪心未定。僧益定心超修。已遂掘得清甘泉焉。余嘆曰。汝輩各有泉。亦患未定心耳。又轉歷石級而上。清陰礙日。涼飈爽然。有半雲亭。眺視曠處。水石覺已高。僧云。此半山也。於時攀磴捫蘿。直凌絕頂。果有古寺名飛來云。從飛棧上掛出。穹懸欲墮。危雲幻界。縹緲一覽。垢消神竦。脩如清都。迺與同游客酌酒前亭。謂諸僧曰。寺旣飛來。會應飛去。何者爲客。何者爲主。諸僧愕不能答。余與客同作游飛來寺詩。憩頃之。拂衣下山。諸僧烹泉水茶來。供坐峽寺方丈。吸之已乃從寺右躋探葛壇石。有葛仙亭。相傳葛洪煉丹處。嶺外葛洪遺跡。不一而足。其所歆勾漏丹砂。今在粵西鬱林境。已爲徭寇占棲。亦無丹砂可探。古人寓指點化人。率此類也。近江有龍磨角石。甚堅澤。磨痕宛然。其左上爲達磨石。謂達磨西來時禪坐處。又下爲釣鯉臺石。趙胡釣鯉貢秦皇處。江畔有犀牛潭。晉咸康中崑崙國貢至此。亡入水。余一一就視各勝。復從寺右上山。繞出絕頂後。探所謂孫恪遇猿妖。有歸猿洞。安昌期題詩棲隱。有和光洞。五色榴花及跋多羅三藏法師所見僧化狻猊石。咸窳沒不可得。迺悟此亦寓指耳。卽前所覽觀諸勝蹟。要不可膠柱猜云。下峽寺出門立。望其前峯聳。

然對如屏障。僧云。卽縹幡嶺。唐將討哥舒晃。夢峽神縹幡助勝。遂名焉。又江灣一嘴迴環處。名凝碧灣。蘇坡老詩云。天開清遠峽。地轉凝碧灣。余因和其全首韻。仍於諸勝蹟各題一絕句。夜泊峽江。明旦發。旣發而聞大羅山寇。是夜出峽山近畔剽掠。余尤喜奇遊中脫一厄云。

古今遊記叢鈔卷之三十三終

古今遊記叢鈔 卷之三十三 廣東省 遊峽山飛來寺記